

quæ peritus potuisset addere, quod nonnullis visum, מצרים, ubi de hominibus sermo est, non efferendum cum Massorethis *Mitsrajim*: quod, ut diximus, nomen est totius regni; sed *Mitsrim*, à singulari מצרי *mitsri*, quod factum à מצר *metser*, Ægyptus.

MORASTHI. Vult esse patriam Michæ Prophetæ. Sed ex Analogia τῶν ἐθνικῶν ὀνομάτων necesse habemus dicere patriam Prophetæ dictam מורשה *morashah*, aut מורשת *moresheth*, undè formatur מורשת *morest*. Scio *Eusebium* & *Hieronimum*, in locis Hebraïcis, efferre etiam *Morasthi* nomen patriæ Prophetæ; sed tam sæpe peccat *Hieronimus* in Sacræ Linguae Analogiam, ut homini ignotam fuisse nemo dubitare possit, sicut jam antea monuimus, ad vocem *Merome*.

MOSCH. Italiam esse nemo dixerit, qui legerit quæ habet *Sam. Bochartus* Phalegi Lib. III. c. 12. ubi liquidò ostendit populos fuisse, qui Moschicam incolebant Colchidi vicinam.

MYRA. Rectum hoc nomen est, non *Myrrha*, nam dicta erat hæc urbs ἀπὸ τῶν μύρων. Vide *Stephanum* Byzantinum ejusque interpretes, ad vocem Μύρα. In sequentibus verbis, mendum est Typographicum, nam pro *Lystra*, quæ est *Lycia*, legendum *Lystra*, quæ est *Lycaonia*, & sic scripserat *Samson*, ut ex ultimis verbis liquet. Sed quodnam genus mendi in sequentibus sit me nescire fateor, nec exiguo opus est acumine Critico, ut fani quidpiam ex iis eruatur. Quid enim hæc sibi volunt: *In Act. Apost. xxvii. 5. ubi de navigatione Pauli agitur, pro Lystra, quæ est Lycaonia, melius habent 70. Interpretes, Myra quæ est Lycia?* Pro 70. *Interpretes*, dicendum fuit *Græci Codices*, aut simile quidpiam; & dicere voluit *Samson*, quamvis calamus animum fefellerit. Usque adeò imperitus non fuit, ut crediderit Acta esse Hebraicè à Luca scripta, & à LXX. Interpretibus Græcè verba.

N.

NAIM. De situ hujus urbis, vide *Joannem Lightfootium* Chorographicorum Luca præmissorum Cap. III.

NEPHTUIM. Habitasse videntur hi populi, qui Hebraicè נפתוחים *naphthoubhim*, Marmaricæ partem aliquam. Vide *Bochartum* Phalegi Lib. IV. c. 29.

NETOPATI. Non est locus, sed nomen נטופה, 2 Reg. xxi. 28. & Jerem. xl. 8. *Netophati* est incola pagi, vel oppidi נטופה *netophah*, de quo 1 Esd. i. 21. Quod si quis objiciat in Versione Latina Jerem. xl. haberi de *Netophati*, unde colligat *Netophati* nomen esse loci, reponemus loco Regum rectè haberi *Netophatites*, quod est nomen נטופה. Nec quidquam hinc colligas, præter inconstantiam Interpretis, quæ cum Hebraicæ Analogiæ accurata cognitione consistere nequit. Antea similia observavimus, pluræque multò possent addi.

NOB. Urbs sacerdotalis in Beniamine, de qua Isa. x. 32. Hinc poterat prospici Jerusalem, si credimus Paraphrastæ Chaldæo in locum Isaïæ. Vide *Joan. Lightfootii* Cent. Chor. in Matthæum, Cap. xlii.

NOPHETH. Miratur *Samson* tertiam partem Nophethæ tribui Manassæ Jos. xvii. 11. cum præsertim nulla fiat alibi mentio hujus urbis, uti nec reliquarum ejus partium. Hæc ostendunt verisimiliorem esse eorum sententiam, qui נפת *hannopheth* interpretantur de tractu regionis. Certè digna erat quæ memoraretur. In hoc ipso Libro Cap. xi. 2. נפת *naphoth Dor*, sunt tractus *Doræ*, & 1 Reg. iv. 11. נפת *naphath Dor*, est idem tractus. Si hæc perpendantur, graviora videbuntur auctoritate LXX. Interpretum, quos sequutus est *Hieronimus*, sed à quibus, nisi velimus dediscere Linguam Hebraicam, abire necesse habemus. Itaque nihil erat cur hisce, potius quàm rei ipsi, crederet *Jac. Bonfrerius* ad Jos. xvii. 11.

O.

OLIVETI MONS. Cum tam sæpe mentio fiat hujus montis in Novo Testamento, miror à *Samone* omissum. Erat ad ortum Jerosolimæ, à qua erat torrente Cedron divisus. Vide *Joan. Lightfootium* Cent. Chor. Matthæo præmissæ Cap. xi.

ONO. Tribus passuum millibus distabat à Lydda, ut docet ex Thalmudicis *Joan. Lightfootius* Decadis Chorograph. Marco præmissæ, Cap. ix. 3. ubi alia de hoc vide.

OPHIR. De hoc loco consule eruditam Dissertationem de Navigationibus Salomonis *P. Danielis Huetii*, quæ Criticis Sacris subjecta est. Hic enim non tantum quid sentiat vir doctissimus, sed & quid alii senserint invenies. Putat ille Ophiram esse oram Orientalem Africæ, *Bochartus* in Taprobana, seu Ceilane, quærebat. Res est obscura & difficilis; de qua unicuique id sentire, quod magis arridet, licet.

OZEN-SARA. Sic est scribendum, non *Ozen-zara*; nam nomen mulieris, à qua oppidum conditum fuit, erat Hebraicè שזרה *Scheerah*. Quamvis S & Z sint litteræ affines, præsertim in Lingua Gallica, non sunt miscendæ.